

Kaji PTPTN ikut syarak atau riba

MELAKA 18 April - Kajian terperinci perlu dibuat bagi menjelaskan status caj perkhidmatan pinjaman Perbadanan Tabung Pendidikan Tinggi Nasional (PTPTN) sama ada ia menepati kehendak hukum syarak atau riba.

Menteri di Jabatan Perdana Menteri, Datuk Dr. Ahmad Zahid Hamidi berkata, walaupun urusan PTPTN di bawah Kementerian Pengajian Tinggi, namun Jabatan Kemajuan Islam Malaysia (Jakim) kerap dihujani pertanyaan mengenainya yang menuntut penjelasan umum.

Katanya, mereka juga mempertikaikan mengapa wang kerajaan mesti dikenakan caj khususnya golongan pelajar yang belum mendapat pekerjaan tetapi sudah diarah membayar semula pinjaman PTPTN.

Sehubungan itu, beliau mencadangkan agar Jawatankuasa Muzakarah Ahli-Ahli Majlis Penasihat Syariah Institusi Kewangan membuat kajian atau pendapat berhubung perkara tersebut bagi menjelaskan perkara itu.

"Pendapat mengenainya perlu dibuat melalui beberapa fakta dari sumber yang terdapat dalam al-Quran atau hadis ataupun pemikiran ulama terdahulu dan juga teladan timbul daripadanya," katanya.

Beliau berkata demikian kepada pemberita selepas merasmikan Muzakarah Ahli-Ahli Majlis Penasihat Syariah Institusi Kewangan di Malaysia di sini malam tadi.

Isu caj perkhidmatan yang dikenakan terhadap peminjam PTPTN mula ditimbulkan pada Disember tahun lalu melalui surat pembaca dalam ruangan Forum Utusan Malaysia.

Berikutan itu, PTPTN menyatakan pendirian tidak akan melupuskan caj perkhidmatan kerana kos tersebut digunakan untuk menampung faedah yang dikenakan terhadap pemberi pinjaman terutama Kumpulan Wang Simpanan Pekerja (KWSP)

Ahmad Zahid berkata, biarpun PTPTN sudah membuat penjelasan berhubung perkara itu, namun masih ada pihak mempertikaikannya.

Sehubungan itu, katanya, perlu ada bukti yang menyatakan caj perkhidmatan PTPTN bukan merupakan caj berbentuk faedah tetapi caj kepada perkhidmatan yang diberikan.

"Bagaimanapun, pada hemat kerajaan, caj yang dikenakan masih rendah dan munasabah.

"Ia bukan faedah kepada peminjam tetapi lebih kepada caj perkhidmatan untuk menampung sebahagian daripada kos pengendalian wang PTPTN," katanya.

Jelas beliau, golongan yang mempertikaikan mungkin sengaja mencari alasan untuk memprotes dengan tidak mahu membayar caj faedah.

Bilangan peminjam PTPTN di seluruh Malaysia berjumlah 1.2 juta manakala dana yang terkumpul pada masa ini ialah RM23 bilion.

Isu caj PTPTN mula diperkatakan persatuan-persatuan pelajar sejak setahun lalu.

Menurut Idris, caj perkhidmatan dikenakan bagi memastikan perbadanan itu mempunyai wang yang mencukupi untuk menampung pinjaman pelajar lain pada masa depan.

"PTPTN sebenarnya tidak mempunyai sumber kewangan. Perbadanan itu mendapatkan wang daripada pemiaya dan pihak pemiaya telah mengenakan pelbagai caj kepada kerajaan termasuk caj kewangan.

"Tetapi semua caj tersebut ditanggung oleh kerajaan dan bukan dibebankan kepada peminjam. PTPTN hanya mengenakan caj tiga peratus bayaran untuk perkhidmatan dan caj itu bukan riba," kata beliau.

Baru-baru beberapa peminjam PTPTN menyuarakan rasa tidak puas hati kerana perbadanan itu mengenakan caj sebanyak tiga peratus daripada jumlah pinjaman yang perlu dibayar semula selepas mereka tamat pengajian di universiti.

Persatuan Kebangsaan Pelajar Islam Malaysia (PKPIM) pula menuntut PTPTN mewujudkan panel syariah kerana terdapat dakwaan yang mengaitkan caj tersebut sebagai amalan riba yang bertentangan dengan Islam.

PTPTN ditubuhkan di bawah Akta Tabung Pendidikan Tinggi Nasional 1997 yang mula berkuat kuasa pada 1 Julai 1997. Perbadanan itu beroperasi sejak 1 November 1997.